

摘藻堂四庫全書薈要

經部

欽定四庫全書薈要

經部

大易輯說卷一



詳校官祭酒臣韋謙恒

欽定四庫全書薈要

大易緝說序

易晦於九師褻於卜筮言易者何紛紛也深者遂為古
奧難測之書淺者又如牆壁勸誡之語象數義理幾於
不相為用學者徒能習知其辭罕究其蘊而易遂虛矣
予所識知母慮十數家言人人殊獨吾友吳幼清最為
精詣往往出人意表今見王君巽卿緝說確然粲然者
也夫乾以易知坤以簡能乾坤毀則无以見易欲知易

固自乾坤始欲知乾坤必先知易簡之用王氏淵源之學其幾是乎惜幼清方留燕山不得相與探賾其說且印吾言之是否也姑著之篇間以為異日張本大德七年良月朔廣平程文海書

嘗觀魏鶴山荅蔣得之書及史學齋臨汝講義皆祖張
觀物語以九其圖者見後天八卦之象十其書者具洪
範五行之數謂晦菴不及見是書故謂十圖而九書余
雖不敢以其說為然然亦無以正其說之不然蓋二圖
無一相合而縱橫十五乃髣髴八卦之位然卦位雖見
而除四正外至補四隅空處老師宿儒復不敢伸一喙
此誠宇宙間一大疑事及分教澧陽時丁石潭遞至沅
陽書院策題以易圖書數偕春秋王正月為問所疑正

與前合余謂十圖九書本體也九圖十書經緯也擬書
荅之未果而石潭已矣至今抱此一恨忽南陽學正李
君章袖編易見示讀之則吾巽卿所著緝說補說也巽
卿生諸老後乃能力探其原而正之取十其圖者分緯
之以畫先天取九其書者錯綜之以位後天自我作古
無一毫之穿鑿有理致之自然真可以斷千百年未了
底公案昔蔣得之指先天為河圖鶴山猶喜之今巽卿
正二圖且緯河洛以為文王全易意見卓勝得之遠矣

巽卿鶴山桑梓使鶴山見此其喜又將何如邪數年來
經生學士晨星落落吞三爻於天上留七分於人間孰
謂天門十六峰下尚有斯人為斯學乎蓋二圖於易猶
河之崑崙源委正則下流正矣故特拈出以與世之知
易者道時大德辛丑日長至昌元王履序

欽定四庫全書

序

欽定四庫全書薈要

大易緝說目錄

元 王申子 撰

第一卷

河圖

先天畫卦

先天或問

希夷先天卦圖

問畫卦自下而上

問畫卦橫而不豎

演極圖說

演極後圖說

太極或問

洛書

後天位卦

後天或問

重卦圖說

重卦或問

往順來逆圖說

先後天或問

衍數圖說

衍數或問

倚數圖說

反對圖說

撰著圖說

第二卷

問成卦之主

問辭象變占

問錯簡脫簡羨文

問周易之名

問六易之說

問日月為易之說

問彖

問彖傳

問文言

問大象

問爻辭

問小象

問繫辭

問序卦

問象數二字

問五行之說

問擬諸物象

問辭同義異

問稱歲年月日

問稱陰陽剛柔動靜

問彖象二物之說

問參伍以變之說

問復姤小父母之說

問古今占卜之學

問揚子雲太玄準易如何

問易太玄潛虛取數

問易太玄潛虛揲著

問易太玄潛虛反對

問太玄潛虛直日之說

問邵亨節經世書

周濂溪太極圖

先賢論无極太極

太極圖或問

第三卷

上經

乾坤屯蒙需訟

師比

第四卷

上經

小畜 履 泰 否 同人 大有
謙 豫 隨 蠱 臨

第五卷

上經

觀 噬嗑 賁 剝 復 无妄
大畜 頤 大過 坎 離

第六卷

下經

咸 恆 遯 大壯 晉 明夷
家人 睽 蹇 解 損

第七卷

下經

益 夬 姤 萃 升 困
井 革 鼎 震 艮

第八卷

下經

漸 歸妹 豐 旅 巽 兌 渙

節 中孚 小過 既濟 未濟

第九卷

繫辭上

第十卷

繫辭下

說卦

序卦

雜卦

臣等謹案大易緝說十卷元王申子撰申子
字巽卿邛州人隱居慈利州天門山垂三十
年始成此書反覆設問取十數為河圖分緯
之以畫先天九數為洛書錯綜之以位後天
同時吳澂李琳諸人咸稱其殫思之精程子
有云說卦所說卦位亦不能使人曉然朱子

云文王八卦不可曉處極多蓋皆闕所疑也
至河出圖洛出書其文見于易傳而相傳五
位九宮則朱震序其授受源流謂陳搏以先
天圖傳種放放傳穆修修傳李之才之才傳
邵雍放以河圖洛書傳李旣旣傳許堅堅傳
范諤昌諤昌傳劉牧據此則劉牧之河圖洛
書與邵之先天圖同本諸希夷然范諤昌以
五位九宮之圖為伏羲所造劉牧以九為圖

十為書及乎蔡元定乃反易之朱子引大戴
禮記明堂鄭注云法龜文證元定之說為確
王應麟據北史證大戴禮記實宇文周時盧
辯注非康成今考康成注易于五位相得而
各有合顯陳一六等數相配之方其注乾鑿
度言八卦九宮亦甚詳而不以為圖書惟關
朗易傳與元定符合然關朗易傳朱子嘗斥
為偽書項安世亦云阮逸所作逸皇祐間人

則又在之才諤昌後矣蓋千有餘年莫知所
謂圖書即五位九宮之數迨陳希夷出始指
以實之宜後人辨論紛紛也是書旁通互貫
足以自達其所見一家之說固亦有未可廢
者耳乾隆四十一年四月恭校上

總纂官

臣紀昀

臣

陸錫熊

臣

孫士毅

總校官

臣

陸費墀

欽定四庫全書

目錄


欽定四庫全書會要卷三百九十二

經部


大易緝說卷一

元 王申子 撰

河圖



先天



河圖


易大傳曰天一地二天三地四天五地六天七地八天
九地十天數五地數五五位相得而各有合此言河圖
數與象也

先天畫卦

伏羲氏仰觀天文俯察地理近取諸身遠取諸物者理
也象也天不秘道龍馬負圖而出於河一奇一耦者數
也象也理與氣寓於其中伏羲之心默與之契遂因之

以畫八卦故大傳言其畫卦之序曰易有太極是生兩儀兩儀生四象四象生八卦是為先天易


易 有 太 極



易者三才之道河圖當分作三宮看三才之象也其中
宮天五地十太極也謂理氣象數所以為萬化之根本
者全體已具而未分渾然居中而舉天地萬物生生化
化盡无以出於此亦无以加於此故曰太極蓋中宮之
五其一其三其五總之則九天也其二其四總之則六
地也合九與六已具十五之全數矣愚故曰天地真元
之數止有五其六其七其八其九其十則各因五而得
數以配上五者而已曰五曰十則數也五為陽十為陰

陰陽氣也五為奇十為耦奇耦象也析而言之三二之合則天地也三個五則三才各一天地也九與六則老陰老陽七與八則少陰少陽也其十五則洛書縱橫之數亦五行生成之數也以五乘十以十乘五則又大衍之數五十也是曰理曰氣曰象曰數靡不全具渾然為一於中而未分豈非兩儀未判之太極乎


是生兩儀



地

兩儀天地也在易為乾坤河圖之上七也二也河圖之中五也十也河圖之下一也六也太極動而生陽一五七之三奇乃陽之輕清者上而為天太極靜而生陰二十六之三耦乃陰之重濁者下而為地豈非太極既判之兩儀乎故先天卦止於三畫


兩儀生四象



河圖中宮之五即參天兩地三二之合也即渾然之兩儀也積之已具十五之全數是天地真元之數止此五者其六七八九十則於五上加一二三四五而得數以配上五者而已故獨取五以生四象河圖次中宮一二三四也以五配一成三耦之六而六之成數在北是為老陰以五配二成二耦一奇之七而七之成數在南是為少陽以五配三成二奇一耦之八而八之成數在東是為少陰以五配四成三奇之九而九之成數在西是

為老陽此豈非兩儀生四象乎

四象生八卦



河圖一五七之三陽上而為天在易則純陽之乾也二
十六之三陰下而為地在易則純陰之坤也乾上坤下
所以辨陰陽之分乾交於坤之中而為坎坤交於乾之
中而為離離東坎西所以著陰陽之交故其畫坎離也
以河圖中宮五陽之左者交於右十陰之右者交於左
自其本體交而後形於外者无不交故取五之奇十之
耦就左三之奇畫離於東離火也且藏八之耦於東之
內故火之象內暗而外明又取十之耦五之奇就右四

之耦畫坎於西坎水也且藏九之奇於西之內故水之
象內明而外暗故曰水火陰陽之交又曰陰陽互藏其
宅是以大傳於水火獨加一不字而曰不相射也陰陽
既交極則必變故其畫兌震艮巽也陽左陰右不離本
體取河圖中宮五與十之一奇一耦就外宮四象已成
之奇耦而畫之中宮五之奇陽也陽動而左故取五之
奇就正南七之奇正東八之耦得二奇一耦畫東南之
卦曰兌又取五之奇就正東八之耦正北六之耦得一

奇二耦畫東北之卦曰震陽極於左則陰轉而右右陰也故取中宮十之耦就正北六之耦正西九之奇得二耦一奇畫西北之卦曰艮又取十之耦就正西九之奇正南七之奇得一耦二奇畫西南之卦曰巽是乾之極則變而兌離之極則變而震坤之極則變而艮坎之極則變而巽也愚故曰乾上坤下所以辨陰陽之分離東坎西所以著陰陽之交兌震艮巽所以極陰陽之變此其所以為易此豈非四象生八卦乎

先天或問

或問漢孔安國劉歆班固皆曰伏羲繼天而王龍馬出河遂則其文以畫八卦禹治水時神龜負文列於背有數至九禹法之以陳九疇魏關朗亦曰河圖之文七前六後八左九右洛書之文九前一後三左七右是漢魏諸儒皆以十為河圖九為洛書初无異說及宋劉牧獨以九為河圖十為洛書易而置之且引大傳而曰二者皆出於伏羲之世故易範相為表裏謂其傳得之范諤

昌謬昌得之許堅許堅得之李溉李溉得之种放种放得之希夷今九經圖及經生學士皆準劉牧之說晦庵雖曾改正然猶有安知圖之不為書書之不為圖之疑今子乃直訂十其數者為河圖且謂伏羲斷斷則是圖以畫八卦天地聖人之旨意果出於是則斯文幸甚其有不然豈不犯大不韙歟

曰正緣漢魏諸儒止言圖書象數而不言伏羲如何則之以畫易大禹如何法之以敘疇遂使劉牧諸人

得而易之而為九圖十書之說以惑後學晦庵雖曾
改正然亦不過案舊說案禮經而訂之至其所自為
說則亦曰安知圖之不為書書之不為圖又曰洛書
固可以為易而河圖亦可以為範使圖書皆可為易
皆可為範則不必改正可也今愚案天之文以求義
之畫即義之畫以溯天之文而得自然而然不容但
已之理雖不敢自謂盡合天地聖人之旨意然十為
河圖義則其文以畫八卦則斷斷乎其不誣矣

又問曰晦庵師友其講明河圖洛書真所謂工深而力到者其說曰河圖以五生數統五成數而同處其方蓋揭其全以示人而道其常數之體也洛書以五奇數統四耦數而各居其所蓋主於陽以統陰而肇其變數之用也又曰河圖洛書之數皆以五居中河圖以生數為主故其中之所以為五者亦具五生數之象焉洛書以奇數為主故其中之所以為五者亦具五奇數之象焉其數與位皆三同而二異蓋陽不可易而陰可易成數雖

陽固亦生之陰也又曰河圖之一二三四各居其五象
本方之外而六七八九十又各因五而得數以附于其
生數之外洛書之一三七九亦各居其五象本方之外
而二四六八者又各因其類以附于奇數之側又曰河
圖主全故極于十而奇耦之位均論其積實然後見其
耦饒而奇乏也洛書主變故極于九而其位與實皆奇
饒而耦乏也必皆虛其中也然後陰陽之數均於二十
而无偏爾又曰河圖六七八九既附于生數之外矣此

陰陽老少進退饒乏之正也洛書之縱橫十五而七八
九六迭為消長虛五分十而一含九二含八三含七四
含六則參伍錯綜无適而不遇其合焉又曰聖人則河
圖者虛其中則洛書者總其實也河圖之虛五與十者
太極也奇數二十耦數二十者兩儀也以一二三四為
六七八九者四象也析四方之合以為乾坤坎離補四
隅之空以為兌震巽艮者八卦也又曰是其時雖有先
後數雖有多寡然其為理則一而已但易乃伏羲之所

先得乎圖而初无待乎書範則大禹之所獨得乎書而未必追考於圖耳今反覆其說義亦深長而子皆不從之何也

曰自古講明河圖洛書之象數未有如晦庵之詳者但先生未免泥漢儒相為表裏之說故一一合圖與書而並言之不思其說之非然也且以河圖五與十為太極是矣然虛而不用却用四傍竒耦各二十為兩儀則是太極自太極兩儀自兩儀而非太極生兩

儀也以六七八九為四象是矣然外之而取卦於四方則是四象自四象八卦自八卦而非四象生八卦也且謂析四方之合以為乾坤坎離不知如何析其合以為坎離於西東而其位不可易謂補四隅之空以為兌震巽艮不知如何惟兌可以補東南惟艮可以補西北而他卦不可補此愚所以不得而從之也又問曰玉井陽氏家傳易學蓋自其五世祖得之曼蓮蕩蓮蕩得之晦庵淵源有自故其家如字溪如以齋各

有易說行于世玉井亦以明易擢高科年將八十工於
易久矣今見子緝說特編二帙與子辨難平山蹇氏又
為之跋以致諸子豈非緝說之砭劑歟其間舉大傳曰
古者包羲氏之王天下也仰則觀象於天俯則觀法於
地觀鳥獸之文與地之宜近取諸身遠取諸物於是始
畫八卦晦庵亦曰聖人仰觀俯察遠物近身固有以超
然默契於心取而畫卦則易非獨以河圖而作也伊川
亦曰圖不出八卦亦須作玉井申之曰聖人畫卦始于

一奇一耦一畫具時畫畫皆具逐節生去八卦而小成六十四卦而八卦之重八卦亦周以子之說為拘泥為不然奈何

曰大傳旨意謂伏羲仰觀俯察遠求近取得其法象文理于心及見河圖與心默契於是則其象數以畫八卦以通神明之德以類萬物之情故曰河出圖聖人則之非謂觀象於天觀法於地近取諸身遠取諸物而遂以之畫八卦也況果如程朱之說則古今所

謂河圖洛書特天地間一贅物耳河出圖洛出書聖人則之之言亦妄矣且玉井逐節生去之說以畫後天橫圖則可若以畫先天圓圖則巽五又居乾一之後則又逐節生不去矣

又問曰玉井難子先天四圖謂乾坤二卦兼取三圈之數乾用五而不用十坤用十而不用五坎離兼用中圈之五與十及本位之生數而不及成數兌震用中圈之五而不用十巽艮用中圈之十而不用五四卦又皆用

本隅之成數而不及生數推詳到此不無偏枯其於兌震曰陽動而左左陽也故用五然兌陰卦也借曰左為陽離胡為而兼用十其於巽艮曰陽既極則陰轉而右右陰也故用十然艮陽卦也借曰右為陰則坎胡為而兼用五是皆出於安排非自然也又曰坎離以五居右十居左兌震艮巽則五居左十居右一左一右皆子自為之所謂附會遷就以成其說者也其難如是奈何曰前賢論先天卦圖者多矣雖康節亦不過據見成

之圖推見成之卦而曰天地定位乾與坤對也山澤
通氣艮與兌對也雷風相薄震與巽對也水火不相
射坎與離對也愚謂伏羲當初位艮於東南位兌於
西北位震於西南位巽於東北亦是相對因何各此
定位而不可易離胡為而不可西坎胡為而不可東
水火相息者也既對則胡為而不相射聖人又胡為
於四句中獨加一不字邪遂取大傳生卦之序求之
河圖案河圖奇耦之象以位八卦研窮數載然後略

見端緒於是分河圖為三宮而三畫之象明錯綜其
奇耦而八卦之位定乃近取諸身而質之然後曉然
蓋乾坤猶人之男女陰陽全體也坎離水火猶一身
之血氣也艮為山猶一身之骨肉髮膚兌為澤猶一
身之津液涕唾震為雷猶一身之聲音巽為風猶一
身之噓吸又血氣之變者也人身小天地亦止有此
八者乾坤兼取三圈之數者陰陽全體也三陽上而
為乾三陰下而為坤所謂分陰分陽兩儀立焉若乾

用十則非純陽之乾矣坤用五則非純陰之坤矣坎離陰陽之交也故五之陽左者交於右十之陰右者交於左是陰陽本體之交也自其本體一交而後形於外者无不交故離居左而兼用十坎居右而兼用五其兼用五與十而不及成數者坎離乃陰陽交之中非交之極又為陰陽互藏其宅故陰之中有陽陽之中有陰所以離陰卦也正居左而為日為火坎陽卦也正居右而為月為水此其所以不相射聖人所

以獨加一不字也其畫兌震艮巽也陽左陰右不離
本體兌震居左故用五不用十巽艮居右故用十不
用五左陽也兌離以陰卦居之故陰卦多陽而陰為
之主右陰也艮坎以陽卦居之故陽卦多陰而陽為
之主也四卦皆用成數而不用生數者陰陽已極而
變也蓋乾之極變而為兌離之極變而為震坤之極
變而為艮坎之極變而為巽也坎離陰陽既分而交
生之後事也故用生數而不用成數兌震艮巽陰陽

交極而變成之後事也故用成數而不用生數愚故
曰乾上坤下所以辨陰陽之分離東坎西所以著陰
陽之交兌震艮巽所以極陰陽之變此其所以為易
蓋太極分而陰陽陰陽分而四象四象分而八卦天
道左旋地道右轉此皆天地造化自然而然之理不
可加毫末人為於其間者也天之圖具此象伏羲氏
因而畫之愚不過探索而發明之耳而謂予安排附
會遷就以成其說可乎

希夷
先天
卦圖



或問曰晦庵謂先天之學康節得於李之才挺之挺之得於穆修伯長伯長得於希夷希夷先天圖說曰先天用九謂乾一與坤八震四與巽五兌二與艮七離三與坎六縱橫皆九而其九居中也希夷又自述龍圖序曰天之垂象的如貫珠皆累累然如繫之於縷也且若龍圖本合則聖人不得見其象所以天意先未合以形其象聖人觀象以明其用是龍圖天散而示之伏羲合而用之仲尼默而形之始龍圖之未合也惟五十五數上

二十五天數也中貫三五九外包之十五盡天三天五天九并十五之用後形一六无位又顯二十四之為用也茲所謂天垂象矣下三十地數也亦分五位皆明五之用也十分而為六形坤之象焉六分而成四象地六不配在上則一不用形二十四在下則六不用亦形二十四後既合也天一居上為道之宗地六居下為氣之本天三幹地二地四為之用三若在陽則避孤陰在陰則避寡陽大矣哉龍圖之變岐分萬途今略述其梗槩

焉以子之見希夷所說其然否如何

曰先賢謂希夷之學知天知地者也後學何所容喙
然以愚見觀之厥初天果散其數以示聖人則必無
前後左右之次何以謂之圖聖人果自合而用之則
是率已意以畫卦又何以謂之因且乾一兌二離三
震四巽五坎六艮七坤八此乃次第生卦之序蓋謂
卦成之初第一為乾第二為兌云耳非若後天離坎
配戴九履一而得九與一之數也今希夷乃以次第

生卦之序為先天用數雖適湊著然非天地之真數

而可用乎其曰圖之未合則陽去一陰去六陽形五
陰形六以明五而顯二十四之用以為天地及圖之
既合陰則天一為宗地六載之而用四十九陽則天
三統地二地四用九以幹五行之數四十亦用四十
九是未合時一數也既合後又一數也二十四四十
九又何足以包羅天地之用邪至如去一去六而後
成數形五形六而後成用幾七八九而後成象避孤

避寡而後成卦愚恐天然之圖不如是之汗漫易簡之易不如是之穿鑿故亦未敢以其說為然也

問畫卦自下而上

或問伏羲當初始畫卦必自下而上何也

曰於以見易者三才生生之象也天地間萬物之生那件不自下而上雖風雲雨露猶自下而上況他乎
問畫卦橫而不豎

或問玉井難子之說曰河圖之數四方平鋪初無橫豎

特畫之簡編其在左右者若豎耳借曰圖有橫豎則水火兩字雖似豎畫坎離然今一六在北二七在南離坎橫而不豎其說為不通矣奈何

曰此愚案卦畫以覆河圖之象見伏羲當初畫卦皆因河圖故先天卦圖圓而不方蓋河圖六一十五二七之象皆橫三八四九在左右則豎故今水火字猶似豎畫坎離以見伏羲取河圖以畫八卦皆出於自然而无一毫作為之意於其間耳故愚止曰伏羲畫

卦之初今玉井以文王重卦之位言之宜其不通也


演極



愚案河圖奇耦以求伏羲畫卦之因復案八卦位次以覆河圖象數之本見河圖中宮天五地十為太極分曉於是以極居中極分而兩儀兩分而四象四分而八卦然後見先天卦位的不可移復從而推之與六十四卦圓圖一一湊著於是作此圖名曰演極以發明之此即太極生兩儀兩儀生四象四象生八卦也即天地定位山澤通氣雷風相薄水火不相射也即康節所謂一中分造化也即濂溪所謂太極動而生陽靜而生陰動極

而靜靜極復動一動一靜互為其根也即數往者順知
來者逆也太極判輕清者上而為天重濁者下而為地
陽左而陰右陽南而陰北水火居陰陽之交因而重之
為六十四乾盡於午中而姤陰生坤盡於子中而復陽
生離日也盡於卯中坎月也盡於酉中皆自然而然此
先天易也

演極後圖



愚因餘暇又以己意畫此圖與前圖無一不合故名曰
演極後圖蓋以天地間陽左陰右陽上陰下乃陰陽一
定而自然之體也於是畫一陽於左畫一陰於右而為
兩儀太極居中又於一陰一陽之外各畫一陽於上一
陰於下而為四象再於左偏短畫陽之左畫一陽於上
而得乾畫一陰於下而得兌於左偏短畫陰之左畫一
陽於上而得離畫一陰於下而得震再於右偏短畫陽
之右畫一陽於上而得巽畫一陰於下而得坎於右偏

短畫陰之右畫一陽於上而得艮畫一陰於下而得坤
愚以是益信伏羲因河圖以畫八卦斷斷乎其不誣矣
此所以知仰觀俯察遠物近身一奇一耦逐節生去之
說決不可以畫先天卦也愚故曰先天易易之體也

太極或問

或問曰玉井舉晦庵之說難子云太極者象數未形而
其理已具之稱且有理而後有氣有氣而後有象有象
而後有數當是時兩儀且未有安有所謂五與十哉朱

子曰虛五與十者太極也此亦猶大衍虛一以象太極之說非謂五與十為太極也子以為如何

曰象數未形而其理已具此雖是晦庵之言然止可以言易有太極之易與濂溪之無極耳非太極也若太極止具其理則是初无一物既无一物則大傳曰太極生兩儀不知一陰一陽之兩儀於何處突然生來便分為兩世豈有是理哉濂溪太極圖說又不應便道太極動而生陽何則自古及今天地間物未有

只具其理空空虛虛而有可動者其動也必是氣存焉氣即陰陽特有分未分之別而已且易中謂一為太極為道為元五為君位為極為中九為老陽六為老陰七為少陽八為少陰九為君德之類甚多若專以數言則一五九六七八亦數而已如上取義皆非也玉井曰當是時兩儀且未有所謂五與十哉是專以數說五與十此豈明易者之言乎況龍馬所負之圖雖有五與十在然出河之初理氣象數之名


猶渾然為一也其中宮五與十以氣言則陰陽渾然
渾然者五陽十陰老少未分也以象言則奇耦渾然
渾然者三奇三耦二奇一耦二耦一奇亦未分也以
數言則三二之合五行生成小衍大衍亦未分也是
曰氣曰象曰數之全體渾然於中而未分故為太極
若次宮外宮則均為陰陽均為象數便非渾然未分
之全體矣愚故曰兩儀天地也以卦言乾坤也其實
一陰一陽也陰陽未分為太極陰陽既分為兩儀是

未分時陰陽渾然既分後陽自陽陰自陰陰又根陽
陽又根陰象立而數行矣到此時然後說得有理而
後有氣有氣而後有象有象而後有數是河圖中宮
五與十實函三極之理氣象數渾然為一而居中謂
非太極不可是太極者不但只具其理而已玉井又
執虛五與十為太極之言謂如大衍虛一以象太極
不思洛書虛五而含十謂之虛其中五可也今既實
用四傍奇耦各二十為兩儀則亦當實用其中五與

十為太極矣不然則是一虛一實一去一取皆人為之非天然也況大衍虛一以象太極而不用者謂天地之數皆始於一故揲著者虛之以象太極渾然之體及分二以象兩儀掛一以象三才揲四以象四時歸奇以象閏則其用也然亦不過以象之而已與此不類此既明用四傍奇耦各二十則亦合用其中五與十矣況五與十實陰陽象數渾然為一之全體而又可虛乎

洛


書



天



後




洛書

伏羲八卦則河圖以畫之然天地間數非奇不行象非耦不立而河圖之數則十而耦也其象則一六二七三八四九五十合而皆奇故先天卦止見易之體而用有未周禹治水時神龜負文復出於洛其數有九九則奇也其象縱橫皆十十則耦也文王於是取之以錯綜河圖重位八卦然後陰陽奇耦亭當不偏而易之體用始備是為後天易故曰河出圖洛出書聖人則之

後天

說卦曰帝出乎震齊乎巽相見乎離致役乎坤說言乎
允戰乎乾勞乎坎成言乎艮此言後天卦位也

後天卦位



此圖中圓者河圖外方者洛書也蓋文王取洛書之奇數耦象錯綜河圖之耦數奇象以重位八卦然後陰陽奇耦不偏易之體用始備何則天地間數无耦象无奇人皆曰二四六八十耦也而不思二之前已有一則已成三矣自二至十數之皆然故曰數无耦非奇不行天地間事事物物有對有待然後成象謂如有父斯有子之象有子斯有父之象有陰斯有陽之象有陽斯有陰之象獨則不成象矣故曰象无奇非耦不立然河圖之

數十則耦也其一六二七三八四九五十合而成象則
皆奇也故先天卦止見易之體而用有未周洛書之數
九則奇也其一九二八三七四六合而成象則皆耦也
故文王取洛書錯綜河圖而用之然後陰陽奇耦亭亭
當當而易之體用始備蓋先合河圖之一六為水位坎
于北二七為火位離于南三八為木位震于東四九為
金位兌于西是合河圖老少四象以位四正也然其象
合而皆奇故又取洛書一含九以河圖正北之一含正

西之九九乃三奇乾老陽數也故位乾于坎之右附于
西北取洛書四含六以河圖正西之四含正北之六六
乃三耦坤老陰數也故位坤於兌之右附于西南取洛
書二含八以河圖正南之二含正東之八八乃一耦二
奇巽少陰數也故位巽於離之右附于東南取洛書三
含七以河圖正東之三含正南之七七乃二耦一奇艮
少陽數也故位艮於震之右附于東北是又取洛書錯
綜河圖之老少四象以補四隅而其象合而皆耦此亦

四象生八卦也由是一陰一陽一奇一耦相為體用由是東壯子至巳陽之方乾坎艮震居之西南午至亥陰之方巽離坤兌居之陰陽各正其位動靜互為其根四時行焉百物生焉故出乎震齊乎巽相見乎離致役乎坤說乎兌戰乎乾勞乎坎成乎艮終而復始生生化化而易行乎天地之中矣圖出於義書出於禹文王錯綜之以重位八卦是為後天故曰河出圖洛出書聖人則之若夫太玄則有數无象而專用奇故奇奇而无對待

經世書則有象無數而專用耦故耦耦而无變通皆不免於一偏

後天或問

或問曰希夷先後天圖說先天之數縱而為六合後天之數橫而為六合合者交會也自文王退乾於西北退坤於西南然後方位交錯於天地既交之後而四時順序五氣流行萬物生生而無窮也康節曰此文王八卦乃入用之位後天之學也又曰文王八卦應地之方又

曰易者一陰一陽之謂震兌始交者也故當朝夕之位
坎離交之極者也故當子午之位巽艮雖不交而陰陽
猶雜也故當用中之偏位乾坤純陰純陽也故當不用
之位經生學士多取康節之說而子皆不以為然何也
曰希夷謂橫而為六合及退乾退坤固非通論而康
節謂震兌始交兌豈始交者乎又謂巽艮居用中之
偏位則乾坤之位亦非中也謂乾坤居不用之位則
巽艮之位亦豈切於用邪且乾胡為不可居於坤之

位艮胡為不可居於巽之宮邪故愚不敢以為然也

又問曰伊川門人問伊川云六子固是乾坤之用西北
西南之位聖人如何安排來伊川曰康節說伏羲八卦
乾位本在南坤位本在北文王重易時更定此位其說
甚長大槩近於附會穿鑿固不曾深留意然說卦所說
卦位亦不能使人曉然且當缺之不必強通也晦庵亦
曰康節言文王八卦這是他不用卦畫生底次第序四
正卦出四角似那方底意思這個且恁地說無大故分

曉證佐未甚安且缺之又曰文王八卦不可曉處多如離南坎北離坎却不應在南北且做水火居南北兌也不屬金如今只看他底慣了似合當恁地相似姑缺之二大賢於此猶缺疑而不敢妄議子乃直取而位之文王旨意果如是乎

曰易大傳謂河出圖洛出書聖人則之使洛書止可以為範則聖人不言之於易矣予取河圖以求伏羲先天八卦既見端的乃求後天於洛書積有餘年然

後見文王取洛書所含之四象以錯綜河圖以重位
八卦是亦本諸天地未嘗加毫末人為於其間雖不
敢自謂盡合文王之旨意然晦庵釋錯綜字有曰錯
者交而互之一左一右之謂綜者總而挈之一低一
昂之謂今以北之一含西之九以西之四含北之六
以南之二含東之八以東之三含南之七豈非一左
一右一低一昂之錯綜乎然則錯綜其數之言夫子
殆為文王發也豈可為先賢缺疑而遂不之思邪

又問曰南軒云天一之水得六而居北為坎地二之火得七而居南為離天三之木得八而居東為震地四之金得九而居西為兌是以坎之數六去三而餘三此三畫之乾所以生於西北離之數七去三而餘四此四畫之巽所以生於東南兌之數九去三而餘六此六畫之坤所以生於西南震之數八去三而餘五此五畫之艮所以生於東北乃四象生八卦也此說如何

曰南軒此說即李泰伯劉牧四方取其位四維取其

畫之說也然後天乃六畫卦若析之則坤六位而十
二畫矣焉得曰六畫之坤乎

又問曰玉井難子之說云案文王錯綜圖書位卦圖乾
與巽猶可通坤與艮則難以強通矣蓋河圖之一在北
九在西二在南八在東位乾於西北位巽於東南猶有
巳鼻若坤位西南四雖在西而六却在北艮位東北三
雖在東而七却在南六遠於坤七遠於艮是不可以強
通矣奈何

曰愚圖文王後天位卦之意先取河圖一六為水位
坎於北二七為火位離於南三八為木位震於東四
九為金位兌於西是先合河圖老少陰陽之四象以
位四正卦然其為象皆奇故又取洛書一四二三含
九六八七之象錯綜河圖而用之以北之一含西之
九位老陽之乾於西北以西之四含北之六位老陰
之坤於西南以南之二含東之八位少陰之巽於東
南以東之三含南之七位少陽之艮於東北是又以

洛書錯綜河圖合其老少陰陽之四象以位四隅然
後其象皆耦由是東北陽之方乾坎艮震陽卦居之
西南陰之方巽離坤兌陰卦居之陰陽各正其位動
靜互為其根奇耦不偏體用兼備而易之道行乎天
地之中矣蓋以北含西以西含北以南含東以東含
南是一左一右交而互之一低一昂總而挈之夫子
所謂錯綜其數也況一四二三生之所在即九六八
七成之所在蓋一四二三積而總之已具河圖天地

之全數故用一則四二三之九在矣用四則一二三
之六在矣用二則一四三之八在矣用三則一二四
之七在矣又獨不見揲著十有八變以取老少陰陽
之策者乎變變皆得一四二三得一四二三即得九
六八七之策此易之神自然而然者也而謂之不可
強通可乎




重

乘

倍

復 頤 屯 益 震 噬 隨 无妄 明夷 賁 既濟 家人 豐 離 革 同人 臨 損 節 中孚 歸妹 睽 兌 履 泰 大畜 小畜 大壯 大有 夬 乾



右


陽

圖

之

卦

坤 剝 比 觀 豫 晉 萃 否 謙 艮 蹇 漸 小過 旅 咸 遯 師 蒙 坎 渙 解 未濟 困 訟 升 蠱 井 巽 恒 鼎 大過 姤



左

陰

先天圓圖陽左陰右易之體也後天橫圖陰左陽右易之用也此二圖不知希夷以前何所託至希夷始出亦已奇矣然諸儒不究其本旨不知其為先後天體用之殊圓圖易之體愚已論之於前矣橫圖為易之用者謂太極既判陰陽已分陰交於左陽交於右而為兩儀兩儀之上各加一陰一陽而為太陽少陰少陽太陰之四象四象之上又各加一陰一陽而為乾一兌二離三震四巽五坎六艮七坤八之八卦八卦之上各加兩儀則

八而十六矣八卦之上各加四象則十六而三十二矣
八卦之上各加八卦則三十二而六十四矣此正所謂
一奇一耦一畫具時畫畫皆具逐節生去八卦而小成
八卦而重為六十四卦亦周也故曰重卦既重後下三
畫則八卦各居其宮上三畫則乾一兌二離三震四巽
五坎六艮七坤八各以次加於八宮之上重乾仍居一
重兌仍居二重離仍居三重震仍居四重巽仍居五重
坎仍居六重艮仍居七重坤仍居八與逐畫生去無少

差異其初畫之一陰卽三十二卦之初六也其初畫之一陽卽三十二卦之初九也劉柔交錯而三百八十四爻成矣皆自然而然此後天易易之用也

重卦或問

或問曰十三卦包犧氏已用之是包犧時已有六十四卦之名矣且大衍起于河圖而生蓍蓍興於犧其十有八變而成卦則是包犧時已重卦明矣今子獨以爲文王重易然則大傳非歟

曰愚詳大傳十三卦之義乃夫子引上古聖人制作
示人以用易之法若曰上古作為某事蓋得諸某卦
之象義云耳非必取是卦始為是事也故張橫渠曰
此夫子之言耳若夫著十有八變而成卦愚竊意伏
義時固已錯重而用之特未定其卦未繫其名及至
文王始重而定之繫之名而為之彖此其所以稱周
易歟

又問曰玉井難子之說云伏羲畫八卦即自重為六十

四卦孔穎達正義已有定說又周禮掌三易之法其經卦皆八其別皆六十四歸藏以坤為首連山以艮為首則夏商時已有卦名矣今王氏以為文王重之始繫以名而為之彖別無證據殆臆度之說也奈何

曰愚歷考傳記重卦聖人諸說不同原其初止有四說王輔嗣等以為伏羲鄭玄之徒以為神農孫盛輩以為夏禹史遷等以為文王後之論者不出此四說愚於四說之中求之伏羲而後神農神農而後黃帝

黃帝以前太朴未散黃帝以後風氣漸開人之情偽
方始交作而六畫卦中有損有益有革有訟有困有
遯有蠱有剝有蹇有解有旅有節有否有明夷等卦
名殊無上古淳朴之意與先天乾兌離震巽坎艮坤
之名氣象大不侔歸藏連山亦不見屯蒙需訟之名
且大傳曰易之興也其當殷之末世周之盛德邪當
文王與紂之事邪愚於是從漢藝文志歸之文王非
臆度也不敢貴耳而賤心思也若孔穎達正義則祖

王輔嗣之註而曰鄭等以為伏羲畫八卦神農重之
諸家以為伏羲畫八卦還自重之初亦未嘗有定說
也又謂予拘於子雲之說子雲其亦從史之一人耳

往順來逆圖



此案先天卦位推後天六十四卦位次以發明陰陽往來進退屈伸也說卦曰天地定位山澤通氣雷風相薄水火不相射數往者順知來者逆是故易逆數也而說者乃以為案已往之跡知未來之事非也蓋案後天六十四卦位次以覆考先天八卦之位而有此已生未生之異也往者已生謂自一陽之復數至六陽之乾是回從先天震四離三兌二而至乾一皆數已生之卦如今日而追數往日也故曰數往者順來者未生謂自一陰

之姤前數至六陰之坤是方從巽五坎六艮七而後至
坤八皆數未生之卦如今日而逆數來日也故曰知來
者逆若一陰一陽之上復加一陰一陽如橫圖倍而乘
之以成六十四卦則自乾一至坤八純數未生之卦故
又曰易逆數也

先後天或問

或問曰玉井難子之說云所謂先天者太極未判之先
元有此易借聖人手畫出來一陰一陽逐節生去不待

安排若先於天而天同之者邵子所謂畫前元有之易
所謂先天之易也此伏羲氏之易也所謂後天之易者
文王因伏羲已成之卦移易方位以應天之時應地之
方若後於天而奉天者今陰陽家皆用之邵子所謂入
用之位所謂後天之易也謂子以伏羲之易為先天文
王之易為後天為不然如何

曰愚謂先天後天只合如今人說前日後日前時後
時時與日亦本於天而用於人者非先於天後於天

之謂果如所說先後二字皆合音去聲況謂先天借聖人手畫出來頗似渺茫謂後天移易方位以應天應地頗似作為所謂太極未判之先元有此易此不過言其理而已正如大傳言生生之謂易而後言成象之謂乾之易也邵子所謂畫前元有易亦言其理而已曰畫前則是未有畫也明矣皆非謂伏羲有畫之易也愚謂通於天者河也龍馬負圖而出於河伏羲因之畫卦於先是為先天中於地者洛也神龜負

書而出於洛文王取之重位八卦於後是為後天義
先文後豈不簡易豈不明白歟

衍

數



一二三四五天地之數止此五者六七八九十各因五而後得數以配上五者而已此五者小衍大衍所由起也故曰衍數然所以為是數者其條有七一者一二三四五積之則十五也二者參天兩地共十五也三者河圖中宮天五地十亦十五也四者洛書縱橫之數皆十五也五者一為太極極生兩儀兩生四象四生八卦亦十五也六者老陰六老陽九共十五少陽七少陰八亦共十五也七者以十乘五以五乘十則大衍之數五十

也是此五者小衍之則為十五大衍之則為五十此亦自然而然易之所以為易也

衍數或問

或問曰大衍之數自張觀物作衍數圖縱橫布筭不可窮極自此以後說之見于世者凡五十餘家近世丁石潭又作原衍圖其說謂天一地二衍而為三地二天三衍而為五以至天九地十衍而為十九總而積之得九十九數餘五十不用止用四十九以為大衍王井問石

潭曰今衍數止九十九又必須虛其一否石潭曰此不用數也然則由古及今諸儒論衍數者初無一定之說而子乃執一己之見以為如是而已可乎

曰說經不比作文作文者可以各立一說說之高者為勝說經則必如唐玄宗所謂傳以通經為義義以必當為主至當歸一精義無二而後可以得聖經之旨況易簡之易乎愚謂大衍之數至易至簡只合如此不用求之於艱深也但天地之數五十有五而大

衍之數止用五十者謂天地真元之數五而已小衍之為十五大衍之為五十若更用此真元之五則是兩個五十矣故虛五而不用而止用五十也顧不易簡而明白歟

倚


徑一圍三

徑一圍四

數

奇圓用全

耦方用半



說卦曰參天兩地而倚數諸說皆以為參天之一三五兩地之二與四獨晦庵曰如此止是積數非倚數也故其論河圖洛書中有曰陽之象圓圓者徑一而圍三陰之體方方者徑一而圍四圍三者以一為一故參其一陽而為三圍四者以二為一故兩其一陰而為四是所謂參天兩地也然未為明白故今圖以明之倚者依也依而用之之謂蓋天之象圓圓者徑一而圍三三之體方方者徑一而圍四奇圓用全故歸奇之餘三其三而

為九四九為三十六乾老陽策也耦方用半謂上與左屬陽故止用半故歸奇之餘三其二而為六四六為二十四坤老陰策也二耦一奇為七四七為二十八少陽策也二奇一耦為八四八為三十二少陰策也易之數皆依此而用之故曰倚數其奇之圓者有上有下其耦之方者有陰有陽又可以見天地間獨陽不生獨陰不成也



乾



坤



蒙



訟

反

師



比



履



否



大有



大有

謙



豫



蠱



臨



觀



賁



剝



復



畜



頤



大過



大過



對

晉



明夷



睽



蹇



解



益



夬



姤



升



困



井



鼎



震



艮



漸



歸妹



旅



兌



渙



節



中孚



小過



既濟



未濟



序卦雜卦皆反對卦也先儒已圖之矣但其說未備且不及雜卦兼未正雜卦之錯簡故此復圖之上篇十八卦其中不反對者六乾坤坎離頤大過也下篇亦十八卦其中不反對者二中孚小過也此八卦雖不反對乃兩兩全體反易且雜卦自大過以下錯簡而不對者亦有八卦愚已移而正之於本文之下予以見縱橫逆順隨時變易无適而不遇其合焉此其所以為易也

揲

虛一

初

變

四十九策

分

二

掛一

左得一則右必三
左得四則右必二
左得二則右必一
左得三則右必四

著

再

變

餘四十策

分

二

掛一

左得一則右必二
左得四則右必一
左得二則右必三
左得三則右必四

取

三餘四十策分

或三十二掛一

變或三十六二

左得一則右必二
左得四則右必三
左得二則右必一
左得三則右必四

策

老陽



掛扐共十三策三變皆得奇也
揲過得三十六策是為老陽

少陰



掛扐共十七策三變得二奇一耦也
揲過得三十二策是為少陰

少陽

掛初共二十一策三變得一奇二耦也
揲過得二十八策是為少陽

老陰

×

掛初共二十五策三變得耦也
揲過得二十四策是為老陰

易之著七七而四十九奇也奇則數也蓋數非奇不行
故易言著曰大衍之數曰天地之數易之卦八八而六
十四耦也耦則象也蓋象非耦不立故易言卦曰設卦
以觀象曰八卦以象告惟奇故圓故曰著之德圓而神
惟耦故方故曰卦之德方以知著探未來之吉凶以示
人故曰神以知來卦藏已往之吉凶以示人故曰知以
藏往以著取卦變而變之合有四千九十六卦二萬四
千五百七十六爻皆自然而然不可加毫末人力於其


間若夫太玄潛虛亦有揲著之法然俱不免於一偏且
不出於自然予已論之于後學者宜參取而並觀之則
知易之所以為神也


大易緝說卷一

謹案第十頁前七行故其中之所以為五者刊本以為二字訛作謂字據朱子易學啓蒙改

第十五頁後二行故五之陽左者交於右刊本右訛君今改

第五十一頁前七行以著取卦刊本著訛者今改





總校官庶吉士

臣侍

朝

校對官檢討

臣

郭

寅

謄錄監生

臣

袁文宿